

improsperum, vt exilio sit multandum aut per summam gratiam ciuitatis fieri debeat compos. De Lubecensi autem statuto non possum quin idem adfirmem, motus articulo 1. Tituli X. Libri I. et iis, quae de praxi SC. Velleiani Meuius ibidem et alibi testatur.

§. VI.

Introducto per Ordinationes Imperii et Recessus iure Romano ius Germanicum haud raro in exilium datum est. Id quod receptum ius repraesentandi in successione collateralium praeter alia comprobatur.

Ast quid multa? ipsa iura Germanica nota vniuersalia legum Romanarum passim sunt clarissima documenta. Auisim, si plus mihi nunc esset otii, conficere librum codicemue non minutum eorum, quae ex iure Romano vel Canonico Ordinationibus vniuersalibus Imperii praesertim Recessuum Corpori veluti arteriae intexta sunt. Annon Recessus Imperii anni 1512. ipsam testamenti introduxit factionem in Germaniam, rem maioribus nostris incognitam inusitatamque et puram putam Quiritum. Quaeso, quae non Romana in Recessu Nouissimo anni 1654. occurrunt? Taceo Ordinationem Cameralem, Ordinationem Criminalem Caroli V. et alias bene multas constitutiones ad vniuersam pertinentes Germaniam, at legibus exoticis refertissimas iisque passim superstructas. Adeo vt mente vix adsequi liceat, qui viris ingentibus meritis clarissimis videri ac pro certo persuasum esse potuerit, Germanos patriis non dedisse repudium legibus, dum iura peregrina adoptauerunt. Quamquam enim Germanica iura, quoad ea non inuasit et quasi e medio sustulit peregrini iuris violentia, et quoad ipse non vsus eadem non abrogauit, merito aestimationem sui auctoritatemque retinent, manifestum tamen est, mores non paucos maiorum ac patria instituta complura exteris in rempublicum legibus introductis euanuisse, eaque parte ipsum Germanici iuris desiderium vanum esse et otiosum. Sane hoc insignem etiam

ca